


TEZAU LITURGIC

4 IULIE

**SLUJBA
SOBORULUI
SF. MUCENICI
ROMANOVI
DE LA MOSCOVA
I**



MOSCOVA, 2000



**Мѣсяца Іулія, въ 4-й дѣнь
Служба святымъ царю
мученику Николаю и всѣмъ
Новомученикомъ и
Исповѣдникомъ Россійскимъ**

НА ВЕЛИЦѢЙ ВЕЧЕРНИ,

**Блаженъ мужъ, первый антифонъ. На Господи
воззвахъ, стихиры на 8, гласъ 1.**

**Начало нынѣ положимъ, о братіе,* молѣніемъ
тѣплымъ къ новымъ угодникомъ Божіимъ:* тѣи
бо страшными мученіи очищаеми,* рождіе
плодоносныя лозы Христовы явишася,*
сладостію благодати обильно напоеми,* во
благоуханіи святости ихъ намъ предлагаеми,* да
со умилѣніемъ назидающесе подвигомъ ихъ,*
принесемъ Богу и мы плодъ покаянія. [Дважды]**

**Начало крещенія страшнаго,* имже паки
крестися земля Русская,* восхвалите, о горы
Кіевскія,* крестомъ апостола Андрея
благословенныя.* Идѣже бо благодать возсія
роду нашему* отъ воды же и Духа во отверженіе
Царствія Божія,* тамо подобаше начатися и
сему обновленію* кровію первозакланнаго отъ
святителей русскихъ,* тезоименнаго**

просвѣтителю нашему.* Сѣй бо Владиміръ
новый,* изъ виноградника своего изведенъ* за
врата священныя лавры Печѣрскія,* вѣнчанія
Стефанова сподобляется,* прощая и
благословляя убивающихъ его,* яко кроткій
молитвенникъ о душахъ нашихъ. [Дважды]

Ины стихиры, гласъ 4:

Рыданіе, жалость и горе,* — се світокъ
Іезекіилевъ, насытивый душу твою,* святе
Тихоне, патріарше нашъ!* Да услышится и нынѣ
гласъ твой:* братіе, архипастыріе и пастыріе,*
зовите чада ваша на защиту Цѣркве
Православныя.* Да услышатъ же и разорители
храмовъ Божіихъ огненное слово твое:* аще еще
только именемъ христіанскимъ нарицаетесь,*
властію намъ отъ Бога данною анаѳематствуемъ
васъ.* — О, страшнаго отлученія вѣчнаго!* Се
анаѳема никимже разрѣшаема!* Се дерзновеніе
патріаршее!

Неблагодарными едины оставленни,* святе
царю нашъ страсготѣрпче Никѳлае,* святая
царице Александро Новая,* небесныхъ же
наслѣднице ѳтроче Алексіе,* царственни
дѣвственницы Ольго, Татіано, Маріе и
Анастасіе,* седмерице святая, многими
униженіи восходъ обрѣтшая,* сострадальцы

четыре съ собою привлéкая,* моли́теся съ
ними Всеблагóму Бо́гу,* да прощéния сподóбитъ
многopегрѣшившія люди россійскія,* умири́тъ
же мѣръ и спасéтъ дѹши наша.

Ины стихиры, гласъ 6:

Крóтокъ, но непоколéблемъ бы́лъ еси,* Пётрѡва
града избрáнниче,* священномучениче
Веніаміне,* копрони́мы нѡвыми обречéнный,*
лжепáстырми преданный власти богоборнѣй.*
Тогда же яви́ тя Бо́гъ учителя безбоя́зненна,* и
се завѣтъ твой, изъ заточéния возвѣщéнный:* да
не пощадимъ мы́ себе́ Цérкве ради* и не
предадимъ Святу́ю Цérковь себе́ ради.* На судѣ
же беззаконнѣмъ твоё сло́во бы́сть всѣмъ дѣвно:*
жизнь ли или́ смéръ нынѣ́ возвѣстите́ ми,* азъ
же знаменовавъ себе́ святы́мъ крестомъ, реку́:*
сла́ва Тебѣ́, Гóсподи Бо́же, о всѣхъ.

Жéртвы Бо́гу живопогребéнныя* въ
кладезеподобный ровъ низринутыя:* прѣжде
всѣхъ Елисаветá страсотѣрпица,* къ гóрнимъ
устремлённая княгиня милосéрдная,* бѣсеръ
православія въ нѡвѣмъ отечествѣ́ обрѣ́тшая,*
евангельски убійцу́ мѹжа своего́ прости́вшая,*
моли́твою и благотворéніемъ Бо́гу угодившая,*
безбо́жными же непощаждéнная.* Помолі́теся
за насъ святіи князіе,* помолі́теся за всѣхъ

преподобнии страсотерпицы,* Елисавето съ Варварою вѣрною.* Услышите насъ, въ вѣси Геосиманійстѣй погребенныя,* услышите насъ и ти, ихже погребеніе невѣдомо.* Услышите насъ паки вкупѣ пріятыя во обители Небесныя,* святая осмерице, молитѣ Бога о насъ.

Слава, гласъ 8:

Адамантово мужество ваше* слава естъ Церкве Россійскія,* страсотерпцы и исповѣдницы новіи,* ученицы бо естѣ Филипповы и Ермогеновы,* присни же многострадальному патриарху Тихону,* иже и даде вамъ имя свое.* Пребысте терпѣніемъ въ бѣдахъ,* гоними и убиваеми.* Но кто изочтетъ и муки, горшія смѣрти?* Обаче явистеся и проповѣдателіе сущимъ съ вами во узахъ,* просвѣтителіе прежденеверующихъ,* строителіе святыхъ таинствъ.* Велія естъ ко Христу любви ваша,* велія вѣра ваша,* во всемъ явисте себе, яко Божіи слуги.

И нынѣ, догматикъ, гласъ тойже: Царь небесный...

**Входъ, прокимень дне, и чтенія 3.
Премудрости Соломоновы чтеніе.**

Праведныхъ души въ руцѣ Божіей, и не прикоснется ихъ мука. Непщевани быша во

очесѣхъ безумныхъ умерети, и вмѣнися озлобленіе исходъ ихъ, и еже отъ насъ шествіе сокрушеніе; они же сѹть въ мирѣ. Ибо предъ лицемъ человѣческимъ аще и муку приимуть, упованіе ихъ безсмертія исполнено. И вмалѣ наказани бывше, великими благодѣтельствовани будутъ, яко Богъ искуси я и обрѣте ихъ достойны Себѣ. Яко злато въ горнилѣ, искуси ихъ и, яко всеплодіе жертовное, пріять я. И во время посѣщенія ихъ возсіяютъ и, яко іскры по стѣблю, потекутъ: судятъ языкомъ и обладаютъ людьми, и воцарится Господь въ нихъ во вѣки. Надѣющіися Нань разумѣютъ истину и вѣрніи въ любви пребудутъ Ему, яко благодать и милость въ преподобныхъ Его и посѣщеніе во избранныхъ Его.

Царствъ третіихъ чтеніе.

Ста Соломонъ предъ лицемъ олтаря Господня, предъ всѣмъ соборомъ Израилевымъ, и воздвиге рѹцѣ свои на небо, и рече: Господи Боже Израилевъ, нѣсть якоже Ты Богъ на небесі горѣ, и на земли низу. Аще небо, и небо небесѣ не довлѣютъ Ти, кольми паче храмъ сей, егѹже создахъ Имени Твоему? и да призриши на молитву мою, Господи Боже Израилевъ, послушати молитвы, еюже молится рабъ Твой предъ Тобою къ Тебѣ днесъ: Да будутъ очи Твої

отвёрсты на храмъ сѣй день и но́щь, на мѣсто сіе, о нёмже ре́кль еси́: бу́детъ Имя Моё та́мо, на услы́шаніе моли́твы, ёю́же мо́лится ра́бъ Тво́й на мѣстѣ́ сѣмъ де́нь и но́щь. И услы́шиши моли́тву раба́ Твоего́ и люде́й Твои́хъ Изра́иля, о нихже помо́лятся на мѣстѣ́ сѣмъ, и Ты́ услы́шиши на мѣстѣ́ обита́лища Твоего́ на небеси́, и сотвори́ши и поми́луеши.

Проро́чества Иса́ина чте́ніе.

Да возра́дуется ду́ша моя́ о Го́сподѣ, облече́ бо мя въ ри́зу спасе́нія, и оде́ждею весе́лія одѣ́я мя, я́ко жениху́ возложи́ мнѣ́ вѣне́ць, и я́ко невѣ́сту украси́ мя красо́тою. И я́ко земля́ растя́щая цвѣ́тъ сво́й, и я́ко вертогра́дъ сѣмена́ сво́я прозяба́етъ: та́ко возра́ститъ Го́сподъ пра́вду, и весе́ліе предъ всѣ́ми язы́ки. Си́она ра́ди не умолчу́, и Іерусали́ма ра́ди не попу́щу, до́ндеже изы́детъ я́ко свѣ́тъ пра́вда моя́, и спасе́ніе моё́ я́ко свѣ́тило разжжѣ́тся. И узря́тъ язы́цы пра́вду Твою́, и ца́рие сла́ву Твою́, и прозову́тъ Тя́ и́менемъ но́вымъ, имже́ Го́сподъ имену́етъ е́. И бу́деши вѣне́ць доброты́ въ руцѣ́ Го́сподни, и диа́дима ца́рствія въ руцѣ́ Бо́га Твоего́. И прозове́шися ктому́ оста́вленъ, и земля́ тво́я ктому́ не нарече́тся пу́ста: тебѣ́ бо прозове́тся во́ля моя́, и земля́ тво́я вселе́нная, я́ко благоволи́ Го́сподъ въ тебѣ́, и земля́ тво́я вкупѣ́ населі́тся. И

якоже живяй юноша съ дѣвою, тако поживуть сынове твой съ тобою. И будетъ, якоже радуется женихъ о невѣстѣ, тако возрадуется Господь о тебѣ.

**На литіи,
стихира храма и новомученикомъ, гласъ 8:**

Ангели Божіи радостніи* призывають, да
возрадуемся вси!* Сіи бо радующесе и о
единомъ грѣшницѣ кающемся,* ликовствують о
множествѣ новыхъ святыхъ,* о мученицѣхъ и
исповѣдницѣхъ Цѣркве Россійскія,*
блистающіяся страданьи ихъ:* се царь, и сущи
отъ дома его,* патриархъ, іерарси, священницы,
монаси* и множество человекъ всякаго званія,*
узами и лишеньми искушеніи,* мученьми же
лютыми и многообразными* и смертію, яже
введе ихъ въ жизнь безконечную.* Сего же ради
подвига ихъ* дадеся имъ благодать молитися за
ны,* царское бо суть ти священіе,* надежда
рода нашего обновленія,* возвѣстители милости
Спаса нашего,* призвавшаго ихъ въ Свой
чудный свѣтъ.

Слава, и нынѣ, богородиченъ, гласъ тойже:

Заступнице усѣрдная,* скорбящихъ прісное
радованіе,* утѣшительница еси призывающихъ
Тя въ часъ испытанія,* Пресвятая Владычице

Бо́городице,* ви́ждь хра́мы Сы́на Твоего́
разоре́нныя,* воззри́ на поруга́ние безбо́жными*
смирённыхъ служи́телей Его́,* услы́ши стена́нiя
рабо́въ Твои́хъ,* и Сама́ со страстоте́рпцы
святы́ми* заступи́ и поми́луй насъ.

На стиховнѣ, стихиры, гласъ 8.
Подобенъ: О, преславнаго чудесе!

Не о сла́вѣ ца́рства земна́го попече́ние имѣ́лъ
еси́,* сла́вный му́чениче царю́ Нико́лае,* егда́
вѣнча́ние на ца́рство и му́ромъ помаза́ние
воспри́ялъ еси́,* но помышля́лъ еси́ о сла́вѣ
Бо́жіей и о Ца́рствѣ́ небесномъ,* въ моли́твѣ
предъ наро́домъ глаго́ля:* Влады́ко мой и
Го́споди,* наста́ви мя́ и вразуми́ въ вели́комъ
служи́нии се́мъ,* да бу́детъ со мно́ю Твоя́
боже́ственная премудро́сть,* послі́ ю́ съ небесъ́
святы́хъ Твои́хъ,* да разумѣ́ю, что́ е́сть уго́дно
предъ очима́ Твои́ма,* и что́ е́сть пра́во по
заповѣ́демъ Твои́мъ,* бу́ди се́рдце моё́ Тобо́ю
управле́но,* е́же вся́ устроити́ ко сла́вѣ Твое́й,* и
къ по́льзѣ́ душе́внѣй вруче́нныхъ мнѣ́ люде́й.* —
Сі́я моли́тва уго́дна бы́сть предъ́ Богомъ,* и
нынѣ́, я́ко му́ченикъ, не преста́й моли́ти Бо́га о
по́льзѣ́ душе́внѣй твои́хъ люде́й,* я́ко да
ми́лостивъ бу́детъ къ́ нимъ,* пода́я намъ́
оста́вленіе грѣ́ховъ,* ми́ръ и ве́лю ми́лость.

Ина стихи́ра, гла́сь 6.
Подобень: Всю́ отложи́вше.

Стихъ: Воззва́ша праведни́и,* и Госпо́дь услы́ша ихъ.

Боговѣнчанная мученице, святая царице Александро,* кто изречеть твоё воистину евангельское житіе?* Прешла еси отъ иновѣрія къ вѣрѣ Православнѣй,* юже воспріяла еси всѣмъ серцемъ твоимъ,* возлюбивши молитву, храмъ и святая таинства,* ещё же поученія святыхъ отецъ,* возрастивши чада твоя во благочестіи,* и уготовляючи ихъ къ мученію за Христа,* терпящи крѣтко клевету забывшихъ Бога,* и не разумѣвающихъ истиннаго благочестія твоего,* сего ради молимъ тя:* моли Христа Бога, Егоже возлюбила еси, да спасетъ души наша.

Ина стихи́ра, гла́сь 8.
Подобень: О, пресла́внаго чудесе́!

Стихъ: Мно́ги скорби́ праведнымъ,* и отъ всѣхъ ихъ изба́вить я́ Госпо́дь.

Сія исповѣдаху святіи царственнии мученицы* предъ неповинною смертію за Христа,* повторяюще святоотеческое завѣщаніе:* мученицы древниі, иже вѣроваху въ Господа

Иисуса Христа,* на смерть идяху яко на праздник,* открыливше умъ и сердце вѣрою,* осуждени же на смерть духъ миренъ имѣяху,* иже ихъ не оставляше никогдаже,* мирно бо на смерть идяху,* внити во иную жизнь духовную уповающе,* яже отверзается за гробомъ.* Дѣломъ сія словеса испытавше,* нынѣ святїи царственнїи мученицы радуются со Христомъ на небесѣхъ,* со дерзновенїемъ молящеся о душахъ нашихъ.

Слава, гласъ 6:

О, святїи смиреннѣйшіе священницы исповѣдницы,* зримъ васъ, како въ страшную годину гоненїй* далече отъ домовъ вашихъ сослани бысте.* Зримъ васъ, гладныхъ, цинготныхъ, вида своего лишенныхъ,* струпіями кровоточащими покровенныхъ,* приставники біемыхъ и сна лишаемыхъ,* плачущихъ о чадѣхъ оставленныхъ* и о матерехъ ихъ беззащитныхъ.* И кто испишетъ имена ваша!* Кто повѣдаетъ міру вся претерпѣнная вами!* Обаче вѣдаетъ Богъ избранныя Своя,* сохранившія залогъ, врученнїй имъ даже до смерти,* и сего ради дерзновение имущія молитися о насъ.

И нынѣ, богородиченъ, гласъ тойже:

Богородице, безпомощнымъ помощи!* Помози и нынѣ страждущимъ людемъ страны Россійскія,* въ заточеніи, въ мукахъ, или въ тяжкихъ обстояніихъ сущимъ.* Тебѣ молимся, молися Владычице* со святыми новомучениками и исповѣдниками рода нашего,* избавитися отъ бѣдъ мнозѣхъ рабомъ Твоимъ.

Тропарь святому царю мученику Николаю, гласъ 5:

Царства земнаго лишеніе,* узы и страданія многоразличныя,* крѣпко претерпѣлъ еси,* свидѣтельствовавъ о Христѣ даже до смерти,* страсотерпче великій Боговнчанный царю Николае,* сего ради мученическимъ вѣнцемъ на небесѣхъ* вѣнча тя, со всѣми новомучениками Христосъ Богъ,* Егоже моли* помиловати страну Россійскую,* и спасти души наша.

Тропарь святымъ новомученикомъ, гласъ 4:

Цвѣти Россійскаго луга духовнаго* въ годину лютыхъ гоненій дивно процвѣтшіи* новомученицы и исповѣдницы безчисленніи:* святителіе, царственніи страсотерпцы и пастыріе,* монаси и мѣрстіи, мужіе, жены же и дѣти,* добрый плодъ въ терпѣніи Христу

принесши,* молитесь Ему, яко насадителю
вашему,* да избавитъ люди Своя отъ
безбожныхъ и злыхъ,* да утверждается же
Церковь Русская* кровью и страданіи вашими*
во спасеніе душъ нашихъ.

**Аще бдѣніе совершается: тропари
единожды, Богородице Дѣво, единожды.**

НА УТРЕНИ

**На Богъ Господь: тропарь святому царю
мученику, гласъ 5, дважды.**

**Слава, тропарь святымъ новомученикомъ,
гласъ 4.**

**И нынѣ, богородиченъ, гласъ тойже: Еже отъ
вѣка утаенное.**

По 1-мъ стихословіи сѣдаленъ, гласъ 7:

Съ любовію веліею къ неблагодарнымъ людемъ,*
принеслъ еси себѣ, великій страсотѣрпче царю,
въ жертву за народъ твой,* якоже реклъ еси:*
аще потребна естъ жертва за народъ, азъ жертва
сія буду.* Больши сея любве никтоже имать,*
аще кто душу свою положитъ за други своя.*
Нынѣ же предстоя Христу, Емуже послужилъ
еси,* моли о насъ, чтущихъ любовію память
твою.

Слава, и нынѣ: богородиченъ:

Ужасно чудо зачатія и несказаненъ образъ
рождества* въ Тебѣ познася, Приснодѣво
Чистая,* ужасаесть мой умъ и удивляетъ
помышленіе.* Слава Твоя, Богородице, всѣмъ
бысть радость,* во спасеніе душъ нашихъ.

По 2-мъ стихословіи съдаленъ, гласъ 2:

Красный лице, свѣтозарни и божественни
свѣтильницы,* Свѣту великому предстояще
присно,* богоблаженни мученицы,* и оттуду
испускаемыми невечерняго Божества сіяніи,*
всегда просвѣщаеми и обожаеми,* вѣрою память
вашу совершающія божественную просвѣтите,* и
омраченія и страстей и бѣдъ и злобы избавите,*
молящися непрестанно о всѣхъ насъ.

Слава, и нынѣ: богородиченъ:

Не премолчимъ присно, Богородице Дѣво,*
благодарственно воспѣвати отъ сердца Твоя
милости Владычице, раби Твои* вопіюще и
глаголюще:* Пресвятая Дѣво, предвари,* и
избави насъ отъ врагъ видимыхъ и
невидимыхъ,* и отъ нужды всякаго прещенія,*
Ты бо еси наше заступленіе.

По́ліеле́й и велича́ніе:

Велича́емъ ва́съ, святы́и царю́ Нико́лае и вси́ новомуче́ницы, и чте́мъ честна́я страда́нія ва́ша, я́же за Христа́ претерпѣ́ли есте́.

Псаломъ избранный: Бо́гъ намъ прибу́жище и си́ла. Помо́щникъ въ ско́рбѣхъ обрѣ́тшихъ ны́ зѣло́. Вмѣ́нихомся, я́ко о́вцы заколе́нія.

Проидо́хомъ сквозѣ́ о́гнь и во́ду и извѣ́ль еси́ ны́ въ поко́й.

По по́ліеле́и съда́ленъ, гла́съ 1:

Я́ко любя́щимъ Бо́га, ва́мъ, о страстоте́рпцы, вся́ претерпѣ́нная на земли́ бы́ша во благо́е. И прешли́ есте́, я́ко избра́ннии, къ о́бщанному́ наслѣ́дію вѣ́чныхъ благо́в. Сла́ва Да́вшему ва́мъ въ тяжкихъ му́кахъ крѣ́пость, сла́ва Вѣнча́вшему ва́съ, сла́ва Дѣ́йствующему́ ва́ми спасе́ніе на́ше.

Сла́ва, гла́съ 3:

Возсія́ли есте́ на тве́рди церко́внѣй, святы́телие́ престоло́въ Росси́йскихъ пе́рвѣйшихъ: Тихоне́ святы́йшій патріа́рше, ана́ѹему враго́мъ Креста́ пла́меннѣ́ изрекѣ́й, Влади́мире святы́телю Кіевскѣ́й, зрѣ́лѣйшій нача́токъ но́выхъ плодо́въ са́да Ру́скаго и Вениа́мине́ свѣ́тильниче́ Петрогра́дскѣ́й, издѣ́тска возжелѣ́вый за Христа́ страда́ти, е́же и бы́сть. Сла́вятся же́ съ ва́ми и

всі страсотерпцы новіи. Мы же со умилєніємъ вамъ сице рцємъ: радуйся, соборе крѣпкій терпѣливый! Будьте молитвенницы дерзновенніи о всѣхъ молящихся вамъ.

И нынѣ, богородиченъ, гласъ тойже:

Красотѣ дѣвства Твоего, и пресвѣтлой чистотѣ Твоей, Гавріиль удивився, вопіяше Ти, Богородице: кую Ти похвалу принесу достойную? Что же возименую Тя? Недоумѣваю и ужасаюся. Тѣмже, яко повелѣнь быхъ, вопію Ти: радуйся, Благодатная.

Таже степенна, 1-й антифонъ 4-го гласа.

Прокимень, гласъ 4: Тебе ради, Господи,* умерщвляеми есмы весь день. Стихъ:

Вмѣнихомся яко овцы заколенія. Всякое дыханіе да хвалить Господа. Евангеліе отъ Матвѣя, зачало 36-е.

По 50-мъ псалмѣ стихира, гласъ 6:

Воскресенія Христова истинніи свидѣтели* явишася новіи страсотерпцы и исповѣдницы,* имже праздникъ сей составихомъ* како бы ти понесли крестъ свой,* аще не бы знали,* яко недостойни суть страданія нынѣшняго времени,* къ хотящей славы явитися въ нихъ.

**Канонъ Богородицѣ, со ирмосомъ на 6,
гласъ 8: Воду прошедъ, и новомученикомъ
на 8, гласъ 6:
Пѣснь 1.**

Ирмосъ: *Волною морскою скрившаго древле,
гонителя мучителя — подъ землею скривша
спасенныхъ отроцы; но мы яко отроковицы,
Господеву поимъ, славно бо прославися.*

Стихъ: *Святїи новомученицы и исповѣдницы
россійстїи, молите Бога о насъ.*

*Господи Боже мой, помози ми смиренно воспѣти
славу новомучениковъ и исповѣдниковъ
россійскихъ, имже за тяжкія страданія любовію
отверзль еси двѣри небесныя.*

*Господи Боже нашъ, славу сію мученикомъ отъ
вѣка бывшимъ даровавый, яко мѹщи ихъ сѣются
во храмѣхъ обновленія нашего ради, подаждь
славу сію и страстотерпцемъ новымъ, аще и
невѣдома сѹть мѣста погребенія ихъ.*

*Царства земнаго лишennyй, Царю же
Небесному и въ бѣдствїяхъ своихъ до конца
вѣрный, молися Ему, святый царю мучениче
Николае, еже не лишитися и намъ утѣшенія
благодатнаго въ бѣдахъ нашихъ.*

Отъ руки священномученика Владиміра
древянный посохъ первопрестольника святителя
Петра пріемый, взыщи мя, овцу заблудшую,
горохищную, о святой патріарше и отче нашъ
Тихоне, обличителю сыновъ противленія.

Богородиченъ: Во успеніи Твоёмъ міра не
оставила еси, Владычице! Не оставила еси и
страну Россійскую, но благоволила еси пріяти
хвалу отъ новыхъ святыхъ страстотерпцевъ.

Катавасія: Отвѣрзу уста...
Пѣснь 3.

Ирмосъ: Тебѣ, на водахъ повѣсившаго всю
зѣмлю недержимо, тварь, видѣвши на лобнѣмъ
висима, ужасомъ многимъ содрогашеся, нѣсть
святъ, развѣ Тебѣ, Господи, взывающи.

Кую дань слова принесемъ вамъ, вѣрніи
свидѣтели слова, добліи страстотерпцы и
пастыре, вмѣнившіися, яко овцы заколенія.

Тебѣ, о Владиміре, первосвятителю дрѣвлія
Кіевскія Церкве, соименне святому
просвѣтителю Руси, подобаше предназначати
славное поприще боренія и страданій.
Преводиши ты боговѣнчанный полкъ
страстотерпцевъ, и да воздастся ти первый
вѣнецъ похвалы.

Посредѣ ополченія добляго зримъ и ты,
священная главо, первосвятителю града святаго
Петра, святителю Веніамине, возлюбленный
паствою твоєю, якоже Іаковомъ тезоименитый
ти дрэвлій патріархъ.

Первый въ чинѣ пресвитерствѣмъ
новомучениковъ ты явился еси, Іоанне
пресвитере, во Америцѣ прѣжде престола Божію
предстоявый. Яко лютыхъ безбожникъ въ
Царскомъ Селѣ обличителя, вѣнча ты Господь
вѣнцемъ мученическимъ, якоже и другаго
Іоанна восторгоименнаго, въ словѣ и въ
мужествѣ предъ мучители дивнаго, съ ними же,
вси священномученицы новіи, заступите насъ.

Богородиченъ: Премилосердая Мати,
Пречистая Дѣво, споболѣвшая Сыну и Спасу
Своему, вѣмы ты Утѣшительницу чадолюбиву: и
оставльшимся во странѣ Россійстѣй и въ
разсѣяніи сущимъ рабомъ Твоимъ.

Сѣдаленъ, гласъ 8.

Немощю плоти намъ подобоострастнии, духомъ
въ мѣру дрэвлихъ отцевъ тщались есте, о
непреклоннии священноисповѣдницы Россійстии,
иже въ разоренную обитель Соловецкую и во
иная мѣста заточенія ссылаемии.

Умножающимся же страданіямъ вашимъ,

избы́точествова́ше тайно и утѣше́ніе отъ
Го́спода, имъ же ны́нѣ и́стѣе утѣша́етесь, въ
невече́рній де́нь дости́гше Ца́рствія Христо́ва, въ
не́мъ же не преста́йте, мо́лимъ ва́съ, моля́щеся о
спаса́ніи ду́шъ на́шихъ.

Инъ съда́ленъ, гла́сь 7:

Страстоте́рпице свята́я княги́не Елиса́вето,* егда́
тя живу́ во алапа́евскую ша́хту вверго́ша,*
ку́пно со свята́ми му́ченики ца́рскія кро́ве,* я́же
бяху кня́зіе Сѣр́гій, Ио́аннъ, Константи́нъ, Игорьъ
и Влади́миръ,* тако́жде му́ченица Варва́ра,* и
святи́й му́ченикъ Тео́доръ,* изнемога́ющимъ же
надолзѣ́ всѣмъ отъ ра́нъ,* облегча́ла еси́ е́ле жива
су́щи страда́нія умира́ющихъ,* воспѣ́ваючи
свяще́нная пѣснопѣ́нія, я́же слы́шаху
мимоходя́щи.* Сего́ ради мо́лимъ тя: моли́ся
Христу́ Бо́гу* прегрѣ́шеній оста́вленіе дарова́ти*
пра́зднующимъ лю́бовію свята́ю па́мять твою́.
[Два́жды.]

Сла́ва, и ны́нѣ, богоро́диченъ:

Егда́ предста́ну предъ лице́мъ Созда́теля моего́,*
въ де́нь пра́веднаго Суда́ Его́,* тогда́,
Влады́чице, предста́ни ми́,* и вѣ́чныя му́ки
изба́ви мя,* да не сніду́ во а́дъ, но да спасу́ся*
Твои́мъ, Пресвята́я Богоро́дице, заступле́ніемъ.

ПѢСНЬ 4.

Ирмосъ: *На Крестъ Твое Божественное
истощаніе провидя, Аввакумъ, ужасся, вопіяше:
Ты сильныхъ пресѣклъ еси державу, Блаже,
приобщаяся сущимъ во адъ, яко Всесилень.*

Осквернённая дѣлы безбожниковъ земля
кропленіемъ кровей вашихъ паки
благословляется. Воды же морскія и рѣчныя
тѣлеса потопляемыхъ святыхъ, яко священіе,
влагаемое въ тыя, воспріяша.

Ермогѣну Московскому тезоимените,
свѣтильниче Тобольскій священномучениче
новый, все житіе твое, яко пламень, егѣже рѣка
Тура никакоже угаси. Потопляемъ бо возшелъ
еси ко Господу твоему, биемъ же по устнама до
конца немолчно молился еси, молишися же и
нынѣ за ны.

Страшно естъ слышимое о мученіихъ святаго
архипастыря Пермскаго Андроника, иже не
бояся мукъ, повеле клятву изрещи на безбожную
власть. Святитель же Черниговскій Василій со
иными посланными отъ Всероссійскаго Собора
увѣдѣти о убіеніи Андрониковомъ, тогда съ ними
пострада, вкупѣ же вси Господу предстоятъ.

Святителя Іосифа древле отъ разинцевъ
убіеннаго прославивый, архипастырь
Митрофанъ жестоко ноцію умерщвляется. Тогда
же и соепископъ его Леонтій пострада. Тако
единѣмъ свѣтомъ Царствія небеснаго сіи триє
священномученицы Астраханстіи озаришася.

Богородиченъ: О, коль мнози святыя иконы
нынѣ руками безбожныхъ отъяты отъ вѣрныхъ,
но не исторгнется образъ благія Утѣшительницы
изъ сердець молящихся, свободы лишѣнныхъ
исповѣдниковъ святыя вѣры.

Пѣснь 5.

Ирмосъ: *Богоявленія Твоего, Христѣ, къ намъ
милостивно бывшаго, Исаія, Свѣтъ видѣвъ
Невечерній, изъ ноци утреневавъ зываше:
воскреснутъ мѣртвіи, и востанутъ сущіи во
гробѣхъ, и вси земнородніи возрадуются.*

Петре и Кирилле, исповѣдницы велицыи и
непреклонніи, нравомъ различніи, но едины въ
вѣрѣ и твердости дѣха, аще и сослани бысте,
обаже всю правду церковную удержали есте,
нынѣ же, яко наслѣдницы Царства небеснаго,
молите Бога, о еже сохранитися и намъ въ
правдѣ сей.

Агаѡангѣле, анге́ле Яросла́вльскіѣ цѣркве, ра́дуйся со дру́ги свои́ми. Отло́женіе бо ва́ше отъ собра́тій, въ пра́вдѣ цѣрковнѣ́й не устоя́вшихъ, ра́дость а́нгеломъ бы́сть. Не восхотѣ́ли есте́ покорі́ти себѣ́ нечѣ́стію: сего́ ра́ди и изыдо́сте, на ско́рбь и лишѣ́ніѣ, крѣ́сть сво́й нося́ще.

Арсѣ́ніе, Вели́каго Нова́града сла́во, еди́не отъ столпо́въ Собора́ Всероссі́йскаго, приско́рбна бѣ́ привре́менно ду́ша твоѣ́, въ темни́цѣ́ ти су́щу, но просі́ѣ вско́рѣ́ побѣ́дно вѣ́ра твоѣ́, побѣ́ждающѣ́ѣ всѣ́ искуше́ніѣ: и яви́лся еси́ до конца́ непрекло́ненъ.

Дамаски́ново житі́е да умилі́ть всѣ́ чту́щія. Ка́ко бѣ́ и на о́стровѣ́хъ Соловѣ́цкихъ, и въ Казахста́нѣ́ и во страна́хъ Сибі́рской, восходя́ къ Голго́ѣе своѣ́й. Ка́ко мразомъ́ сибі́рскимъ́ томимъ́, при брѣ́зѣ́ рѣ́ки неиму́щему іере́ю ве́рхнюю́ рясу́ свою́ отдаде́. Са́мъ же въ стужѣ́ зимнѣ́й на плоту́ Бо́гу ду́хъ предаде́, еди́нъ отъ тѣ́хъ, іхже́ міръ́ ве́сь недо́стоинъ́ бѣ́.

Богородиченъ: Наста́внице́ свѣ́тителей́ твѣ́рдыхъ́, Пречі́стая Дѣ́во, наста́ви на́съ мы́слити́ и глаго́лати, и дѣ́яти то́чію пра́вая, ревну́юще́ не пожа́львшимъ́ себѣ́ исповѣ́дникомъ́.

ПѢСНЬ 6.

Ирмосъ: *Ятъ бысть, но не удержанъ въ персехъ китовыхъ Іона: Твой бо образъ нося, Страдавшаго, и погребенію давшагося, яко отъ чертога отъ звѣря изыде. Приглашае же кустодіи: хранящии суетная и ложная, милость сію оставили есте.*

Едема сладчайшаго наслѣдницы показастеся, новомученицы земли Русскія; блажени есте, яко отъ плача вашего утѣшитесь на небеси: возжадали есте правды, еяже насыщаетеся изобильно въ Царствіи небеснѣмъ.

Дщери царевы съ матерію святою въ заточеніи суровѣмъ утѣшеніе себѣ отъ писаній святыхъ отецъ почерпаху и тако Христу уневѣстившася. Алексій же отрокъ, братъ ихъ, рукама царя мученика внесенъ бысть тамо, идѣже сіи царственнии съ четверицею сострадальцевъ убіени бывше, яко жертвы одушевленнии за родъ нашъ Богу предсташа.

Шахта гробъ бысть, въ ней же Елисавета преподобномученица сконча царственный путь свой съ Варварою о Господѣ сестрою и съ прочими шестію. Таможде княгиня страсготѣрпцу князю Іоанну рану обяза. О,

святїи Алапаевстїи мученицы осмочїсленнїи,
уврачуїте нынѣ раны душъ нашихъ.

Въ страшныя дни сіи пострадавшїи во странѣ
нашей Россїйстѣй угодницы Божїи, знаменїтїи и
невѣдомїи, монаси, инокини, мужи и жены со
чады, укрѣпите ны молитвами вашими, еже
исправляти намъ пути наша предъ Господемъ,
поминающе подвигъ вашъ.

Богородичень: Множицею избавися отъ бѣдъ и
золь родъ нашъ, молящимся людемъ предъ
Твоими, о Богомати, святыми иконами.
Совокупи и нынѣ, Владычице, вся моленїя наша
о избавленїи отъ лютѣйшїа бѣды,
предстательствомъ Твоимъ.

Кондакъ святымъ новомученикомъ, гласъ 2.

Новїи страсотерпцы Россїйстїи,*
исповѣднически поприще земное претекши,*
страданьми дерзновение прїимши,* молитесь
Христу, васъ укрѣпившему,* да и мы, егда
найдетъ на ны испытанїа часъ,* мужества даръ
Божїй воспрїимемъ.* Образъ бо есте
лобызающимъ подвигъ вашъ,* яко ни скорбь, ни
тѣснота, ни смерть* отъ любве Божїа разлучити
васъ не возмогоша.

Икосъ.

Егда начинахуся дніе огненнаго искушенія Цѣркве Россійскія и не благоволи Господь пріяти отъ насъ всесожженія и жертвы, тогда мнози архіерее и священницы не приложишася плоти и крови, но уразумѣвше волю Господню, сами себе принесоша, яко непорочное заколеніе. И вслѣдъ Первосвященника Вѣчнаго и Ходатая Новаго Завѣта внидоша сіи во святилище съ кровію своею, да очистятся грѣси людстіи. Славни суть имена ваша, мужественніи страсготерпцы, образъ бо намъ есте, лобызающимъ подвигъ вашъ, яко ни скорбь, ни тѣснота, ни смѣрть отъ любве Божія разлучити васъ не возмогоша.

Пѣснь 7.

Ирмосъ: *Неизреченное чудо: въ пещи Избавивый преподобныя отроки изъ пламене, во гробъ мертвъ бездыханень полагається, во спасеніе насъ поющихъ: Избавителю Боже, благословенъ еси.*

Страданьи вашими Цѣрковь Русская славится, мученицы новіи, сродницы наши чина и сословія всякаго, за Христа отъ безбожныхъ убіенніи, во спасеніе насъ поющихъ: Избавителю Боже, благословенъ еси.

Ору́жіе — крѣсть и щитъ — вѣру во Христа́, страданія же и смѣръ пріяли есте́, во спасеніе насъ поющихъ: Избавителю Бо́же, благословенъ еси́.

Злобу́ слугъ сатанинскихъ, сожженную совѣсть имущихъ, обличи сожигаемый сіми святитель Іоаннъ Рижскій, такожде и повѣшенніи: святитель Воронежскій Тихонъ, и пресвітеръ Симферопольскій Алексій и прочіи звѣронравнѣ умученніи. Тебѣ же, о Господи, сіи въ Царствѣ Твоёмъ свѣтлѣмъ зывають: Избавителю Бо́же, благословенъ еси́.

Страстотѣрпцы младенцы убиенныя, яко птицы чистыя въ гнѣзда небесныя пріемлетъ Господь, непрестанно въ рай воспѣвающія: Избавителю Бо́же, благословенъ еси́.

Богородиченъ: Избавительнице людей Твоихъ присная, умоли Сына и Бога Твоего паки избавити домъ Твой отъ лютейша всѣхъ прежде бывшихъ бѣды, да со умиленіемъ возглаголемъ Ему́, спасенніи Тобою: Избавителю Бо́же, благословенъ еси́.

Пѣснь 8.

Ирмосъ: Ужаснися, бойся, Небо, и да подвижатся основанія земли: се бо въ

мертвецѣхъ вмѣняется въ Вышнихъ Живѣй, и во гробѣ малѣ страннопріемлется. Егѡже ѡтроцы благословіте, священницы воспойте, людіе превозносите во вся вѣки.

Испрасте ризы ва́ша кровью́ свои́ми, убѣли́сте же ихъ кро́вию А́гнца, за челове́ки закланнаго, Егѡже ѡтроцы благословіте, священницы воспойте, людіе превозносите во вся вѣки.

Ублажимъ святителя Іосифа Петроградскаго, непорѡчности Цѣркве та́йныя ревнителя, въ прогна́ніи ло́же свое́ ме́жду сви́ніями нечи́стыми имѣвшаго, и слы́шимъ егѡ на́мъ въ слухъ се́рдца глаго́люща: страда́ньми свои́ми и вѣрностію превозносите Христа́ во вся вѣки.

Сла́вны и въ житіи́ и въ кончи́нѣ своей́ святители Серафимъ Угличскій и Максимъ Серпуховскій, онъ же и врачъ, на та́йное епископство́ благословенный. Много́трудно е́сть служе́ніе Цѣркве гонимы́я, егѡже и соверши́вше сіи, предста́ша Христу́ Бо́гу, моля́ще Егѡ о ста́дѣ свое́мъ, сла́вяще же Егѡ прісно во вѣки.

Небе́сныя хвалы́ ли́че неусы́пный, новомученицы́ добропобѣдніи земли́ Ру́сскія, ны́нѣ прісно причаща́етесь А́гнца прісноживо́тнаго, за Него́же отъ безбо́жныхъ убі́ени бы́сте, Егѡже ѡтроцы благословіте,

священницы воспойте, людіе превозносите во вся вѣки.

Богородиченъ: Пресвятая Владычице, спаси, свободи и понинѣ страждущія рабы Твоя, даруй имъ терпѣніе и крѣпость. Въ Тебѣ полагаемъ надежду всю, блажимъ Тя присно и превозносимъ Сына Твоего и Бога во вѣки.

Пѣснь 9.

Ирмосъ: *Не рыдай Мене, Мати, зрящи во гробъ, Егоже во чревь безъ сѣмене зачала еси Сына: востану бо, и прославлюся, и вознесу со славою, непрестанно яко Богъ, вѣрою и любовію Тя величающія.*

О, новіи страсотерпцы, иже подвигъ противу злобы безбожныхъ подъяша, вѣру Христову яко щить предъ ученіи міра сего держаще и намъ образъ терпѣнія и злостраданія достойно являюще.

О, твердости и мужества полка мученикъ Христовыхъ, за Христа убиенныхъ! Ти Церковь Православную украсиша и въ странѣ своей крови своя, яко сѣмя вѣры, даша. Купно со всѣми святыми достойно да почтутся.

Слышимъ вси, како чудная Лидія, въ страданіихъ, аще и плачуши, твердая, на

состраданіе Кирилла подвиже, иже и бысть ей щить, мечъ же мучителемъ звѣрствовавшимъ. И спасе Христосъ Кирилла купелію крове его. Сія повѣдавый Цѣркви Алексій и самъ пострада. Молитвами сихъ тріехъ, Боже, помилуй насъ.

О святіи, ихже здѣ помянухомъ, и множайшее множество невѣдомыхъ! Простите убожество словесъ сихъ, да напишутся еще похвалы, вамъ подобающія. Исчислити васъ невозможно естъ. Всѣхъ же молитвами, да примутъ чтущія васъ отъ Господа и Владыки живота нашего благодать и велию милость.

Богородичень: **О**, Всепѣтая Мати! Аще и разорися отъ злыхъ великая цѣрковь Твоя Печерская, въ ней же священномученикъ Владиміръ приблизившуся дни убіенія его, со многимъ умиленіемъ акаѳистъ чтый, Тебѣ моляшеся, но не оскудѣетъ во вѣкъ къ людемъ кающимся милость Твоя. Радуйся, Обрадованная, во Успеніи Твоёмъ насъ не оставляющая!

Свѣтилень:

Вельми свѣтель явися намъ подвигъ вашъ, святіи новомученицы и исповѣдницы во дни сія, малодушіемъ омраченныя, оскудѣ бо вѣра за умноженіе беззаконій нашихъ, охладѣ любви,

поколеба́ся наде́жда, до́блесть же ва́ша озари́
сла́вою но́вою Ру́сскую Це́рковь.

Сла́ва, и ны́нѣ, богоро́диченъ:

Державнымъ Твоимъ покровомъ, Чистая, насъ,
рабовъ Твоихъ, сохраняй всегда, отъ навѣтъ
вражїихъ неврежденныхъ, Тя бо еди́ну
стяжа́хомъ прибѣжище въ напа́стехъ.

На хвалитехъ, стихиры на 4, гласъ 6.

Полкъ боговѣнчаненъ нынѣ явльшихся
мученикъ, заклѣнїе непорочно́е за Христа́
пожрѣнное усердно́, святоизбранное во́инство,
мучениколю́бцы, прїидите, всесвященную
па́мь духо́вно совершивше, возопіемъ къ
нимъ: сокрушите сверѣпство агарянь
безбо́жныхъ, и изба́вите лю́ди
благочестномудренныя, моли́твами ва́шими,
всякаго обстоя́нїя.

Ины стихиры, гласъ тойже.

Подобенъ: Все отложше.

Первоуби́енни за вѣру и Це́рковь,* пѣрви по
и́мени поминовѣнни святѣ́йшимъ патриархомъ:*
о святителю Влади́мире, Пече́рскїй агнче,* и
пресви́теры старѣ́йшии сіи:* Ио́анне, Пѣ́тре же
Ю́сифе и Па́вле,* преподобномученицы же
Герва́сіе, Гера́симе,* па́ки же

священномученицы Пáвле, Пётре и Θεодоре,*
Миха́йле, и Влади́мире и Константи́не,* диа́коне
Иоáнне, послу́шнике Анто́ние и смотре́телю
Иоáнне* со мно́гимъ мно́жествомъ священныхъ, и
монаховъ, и ми́рскихъ,* ихже имена́ вся вѣсть
Госпо́дь,* моли́те Его́ о е́же спасти́ся намъ.

Вку́пъ со святы́мъ царёмъ на всякъ дeнь
оскорбляеми,* о святы́я цари́це страстоте́рпице
и дѣвы́ царственни́и,* о́троче же царственны́й
святы́й* и послужи́вшии вамъ сострада́льцы
вѣрнии,* но́щю неправеднѣ вси́ уби́ени бы́сте,*
та́же, яко́ жeртвы правды́ всесожжeни* ходата́и
естe о насъ, яко́ кади́ло Бо́гу благово́нное.* Съ
вами́ же и во други́й дeнь въ стра́шныхъ му́кахъ
живопогребeнни́и* со княги́нею свято́ю и
други́нею ея́.* Ны́нѣ же всѣхъ спострада́вшихъ
предваря́я, о царю́ Нико́лае,* ро́да на́шего
святы́й печа́льниче,* яко́ но́вый Иовъ, Господа́
моли́ прости́ти всѣхъ.

Гласъ 8.

Отреко́шася проси́ти ми́лости* осужде́нни отъ
безбо́жникъ священни́цы Бо́жии* ихже
благослови́ святы́й патриа́рхъ,* на му́ки и на
сме́рть за Христа́.* Егда́ же воу́трие ве́доми бы́ша
на ка́знь,* не вѣдяху стра́жиe,* како́ срѣтши́я ихъ
вѣрны́я отгони́ти.* Лобыза́ху бо лю́дие

обречѣннымъ смѣртникомъ* и священныя рѣцѣ ихъ и одежды край,* онѣмъ побѣдно поющимъ:* Христось воскресе изъ мѣртвыхъ,* смѣртію смѣрть поправѣ.* Господи молитвами священномучениковъ сихъ помилуй насъ.

Слава, гласъ б:

Молитвами, Христѣ, святыхъ мученикъ Твоихъ,* убиенныхъ за вѣру въ Тя,* великихъ князей: Михайла, Павла, Димитрія и Георгія,* и вѣрныхъ царскихъ слугъ: Иліи, Васілія и Евгенія,* Анастасіи, Екатерины и Анны,* Алексія, Іоанна, Клімента, Іоанна и Николая,* помилуй и спаси души наша,* яко Благъ и Человѣколюбець.

И нынѣ, богородиченъ:

Богородице, Ты еси лоза истинная,* возрадившая намъ плодъ живота,* Тебѣ молимся, молися Владычице* со святыми царственными страстотерпцы и всѣми новомученики,* помиловати души наша.

Славословіе великое. Ектеніи и отпусть.

НА ЛИТУРГИИ.

Блаженна отъ канона пѣснь 3-я и 6-я на 8.

**Прокимень, гласъ 4: Тебѣ ради, Господи,*
умерщвляеми есмы весь день. Стихъ:**

**Вмѣнихомся яко овцы заколенія. Апостоль къ
Римляномъ, зачало 99. Аллилуія, гласъ 1.**

**Богъ намъ прибѣжище и сила, помощникъ въ
скорбѣхъ обрѣтшихъ ны зѣло. Стихъ: Господи,**

**спаси царя и услыши ны, въ онъже аще день
призовемъ Тя. Евангеліе отъ Іоанна,**

**зачало 52. Причастень: Радуйтесь праведнии о
Господѣ, правымъ подобаеть похвала.**

МОЛИТВА

**святѣмъ Новомученикомъ и
Исповѣдникомъ Россійскимъ:**

**Святѣи новомученицы и исповѣдницы Церкви
Россійскія, услышите усердную мольбу нашу!
Вѣмы, яко нѣци отъ васъ, еще отроцы суще,
послушающе о дрѣвнихъ страстотерпцѣхъ, въ
сѣрдцѣ своемъ помыслиша, колико прелюбезно и
доброхвально естъ таковымъ подражати, ихже
ни муки, ни смѣрть не разлучиша отъ любве
Божія. Благо же вамъ, яко послѣдовали есте вѣрѣ
и терпѣнію тѣхъ, о нихже слышасте и ихже
возлюбисте. А понеже на всякое время
возможно естъ найти на ны испытаніемъ**

нечаяннымъ, испросите отъ Господа намъ мужества даръ, иже толико благопотребенъ естъ въ житіи челоуѣчествѣмъ. Вся концы отечества нашего страданьи своими освятивши, яко общія за вся ны молитвенницы, умолите Бога избавити люди своя отъ ига, ужаснѣйшаго паче всякаго иного. И да отпустится намъ и всему роду нашему грѣхъ, на народъ Россійскомъ тяготѣющій: убіеніе царя, помазанника Божія, святителей же и пастырей съ паствою, и страданія исповѣдниковъ, и оскверненіе святынь нашихъ. Да упразднятся расколы въ Церкви нашей, да будутъ вси едины, и да изведеть Господь на жатву дѣлатели Своя, сіестъ да не оскудѣваетъ Церковь пастырьми добрыми, иже имуть просвѣщати свѣтомъ истинныя вѣры столь великое множество людей, вѣрѣ ненаученныхъ, или отъ вѣры отвратившихся. Недостойни есмы милости Божія, обаче страданій ради вашихъ Христось Богъ нашъ да ущедритъ и помилуетъ всѣхъ насъ, въ поможь васъ призывающихъ. Мы же Ему, Спасителю нашему, со Отцемъ и со Святымъ Духомъ сокрушеніе о грѣсѣхъ и благодареніе за вся всегда да приносимъ, славяще Его во вѣки вѣковъ. Аминь.

**Источникъ: Служба святымъ царю мученику
Николаю и всѣмъ Новомученикомъ и
Исповѣдникомъ Россійскимъ. — Villemoisson
(France): Изданіе общины при храмѣ святыхъ
царя мученика Николая и всѣхъ
Новомучениковъ Россійскихъ, 1992. — 23 с.**

